

Bubali: Historia di Arend Petroleum Maatschappij – Dufi Kock

Bubali:

Bubali cu su excelente terenonan bieu pa plantacion tabata ser usa pa e Chinesnan pa cultiva berdura y tambe na San Miguel di famia Arends. Rond di año 1906, Adriaan Lacle a laga traha un cas grandi na honor di su yiu muhe, Maria del Carmen of Carmita. E tabatin tambe un barco cu e number di Carmita. E cas grandi aki na Bubali, Quinta del Carmen, a biba y comparti cu e historia di Eagle. Tambe tin e recordatorio di e gloria di pasado di e refineria Arend Petroleum Maatschappij. E maatschappij aki como un parti independiente di e grupo di Shell Mexico pa Aruba a cambia y te hasta un parti di nan materialnan di Mexico a wordo trec'i pa Aruba, a traha na Aruba di 1927 pa 1953. E compania a tuma over terenonan pa su negoshi for di famia Kelly, Eckmeyer y Adriaan Lacle.

Tres año despues di e binida di Lago a aparece e di dos refineria na Aruba. Na año 1927 a establece e “Compania Maxicana de Petrol el Aguila” na Druifbaai na e parti west di Oranjestad. E doño di e industria aki tabata e grupo di Koninklijke Shell, na mes momento doño di esun na Corsou. E refineria nobo a haya e number di N.V. Arend Petroleum Maatschappij, miho conoci como “Arend” of “Eagle”. Eagle a keda un refineria modera, si tuma na cuenta capacidad di productonan y e empleo loke ta concerni e influencia di e sociedad.

Prome cu Lago ya Eagle na año 1928 a cuminsa cu refinacion di azeta cual ya na 1943, durante e di Dos Guerra Mundial a wordo para. Durante e añanan di guerra e deposito a wordo usa pa e azetanan di Lago. Despues di e guerra, e producto a wordo resumi un bes mas pero pa un tempo cortico. Na año 1953 a stop e actividadnan di e industria. E tereno a wordo limpia y entrega bek na gobierno. E restonan di un waf bieu, dos edificio di e compania, e casnan di e empleadonan na Engelandstraat y un pida rail ta recorda nos ainda di Eagle. Tambe e tereno bieu di e industria y un parti di e beach ainda ta carga e number di Eagle.

Over di e origen di nan empleadonan: E forsa laboral tabata mayoria trahadonan Arubiano, cu a biba rond di e isla, y tur dia tabata bin riba truck pa yega trabou. E trahadonan di oficina mayoria tabata di Inglatera.

E number Arend (number di un aguila na Hulandes) a bin for di e number Maatschappij bieu Mexicano, El Aguila. Esakinan a keda bibo ainda den memoria di e nombrenan Eagle Beach, Eagle Bar y Eagle Colony. Naturalmente, den e number aki no mester lubida riba e trahadonan di antes di e maatschappij, cu te ainda ta ricibi nan pension. E importancia di Eagle pa e historia di Aruba y e proporcion social, compara cu Lago a wordo limita. Hopi ta esnan cu no por a haya un trabou eynan. Mas o menos cuatro cien y cuarenta hende Eagle tabatin den servicio, di cual mas o menos cuarenta, segun nan posicion, nan y nan famia por a haya un cas di e industria den e colonia Arend. E trahadonan local, mayoria tabatin un cas cerca di Playa. E casnan den e colonia Arend tabata bungalownan di palo y comfortabel, situa rond di un club, cu desde e inversion pa e industria continuamente tabata e centro di encuentro y fiesta. Tambe den e becindario ambiental aki tabatin canchanan di tennis, un teatro di cine aire liber, un pisina, un cancha di golf y un veld di bala pa practica diferente tipo di deporte na disposicion di e personal. E cancha di golf a wordo traha pa un talentoso golfista di Australia, Sr. Jack O'Hara, mas o menos na año 1937 y tabata wordo usa activamente. Den realidad, e tabata un cancha di siete buraco, pero dos buraco tabata wordo hunga dos biaha. E frishider di e club tabata riba e veranda di e cas aki

Pa su personal e industria inicialmente a zorg pa nan mesun hospital, menos e tempo cu el a sera durante e di Dos Guerra. Pa examinacion y consulto medico, un policlinica di e industria a wordo lanta, mientras cualkier cuida na hospital a wordo atendi na Hospital San Pedro na Aruba y si tabata necesario servicio medico di Curacaosche Petroleum Industrie Maatschappij na Corsou lo a zorg pa esey.

Arend Petroleum Maatschappij, den cuminsamento, a tuma over e cas tambe y a laga e gerente Newton biba aden. Dia Dokter Dussenbroek a bin pa Eagle, Quinta del Carmen a bira e cas di e dokter y e gerente a haya un cas den e colony. Na aña 1929, pega patras di e cas di dokter a lanta un hospital chikito pa e empleadonan di e maatschappij. Prome cu esey a traha un espacio unda e hospital chikito aki por a duna servicio. Patras di e hospital di Quinta del Carmen tabatin un cas yen di mata di dadel.

Cura di Bina:

Dokter Dussenbroek, cu a bay experimenta pa cultiva mata di appel a haya despues dokter Harrisen, cu a usa e hardin di Quinta del Carmen como un cura di bina. Seis bina tabata cana rond. Dokter Slacht tambe a haya un cas di dokter patras di Quinta del Carmen, unda antes tabatin un cas chikito di famia Ecury. Quinta del Carmen tabata antes tambe un cas di nursenan. Na aña 1953 cu Eagle a sera, e hospital a wordo kibra y e material cu tabata sirbi ainda, a wordo usa pa casnan di Help Elkander. Quinta del Carmen a wordo entrega na Dokter Van der Kuip.

Hospital:

Den historia di Aruba ta menciona algun hospital chikito mas. Na aña 1829 Aruba tabatin un hospital chikito unda tabatin, entre otro, dos ingeniero/minero Aleman como pashent, nan tabata Srs. Pfiffer y Schumacher. Segun un rapport, esaki tabata na cuminsamento di e tempo di oro. Dokter Hopkins den aña 1912, den un espacio chikito tabatin un hospital na Madiki cu e tabata duna servicio. E por a duna servicio medico na mas o menos diesseis pashent. Doloria tabata un nurse ey nan. E tabata principiamente destina pa duna servicio medico na esan cu tabata biba hopi leu. Algo similar nan tabata haci tambe na Boneiro, unda cierto pashentnan di Rincon por a hospeda na Antriol of Playa Pabou.

Na aña 1920 Hospital San Pedro a wordo lanta den e cas bieu di e directeur di Goudmaatschappij. E plan tabata pa Sividivi pronto lo por a bira un hospital di Aruba den e tereno bieu di Eagle na Druifbaai.

Quinta del Carmen:

E edificio monumental aki ta rico den nos historia.

Esaki a cuminsa na aña 1916, ora e arkitecto famoso, Sr. Adriaan Lacle, a dicidi di traha un cas, estilo di “cunucu” pa pasa fin di siman y vacacion (esey e nomber ta para p’e) y a nombr’e na su yiu muhe, Maria del Carmen.

E refinaria di Eagle a wordo estableci na Aruba, mayor parti pa crudo cu tabata bini for di Venezuela. Como cu accidentenan tabata sosode cu frecuencia riba e barconan, un hospital amplio y un cas pa recuperacion tabata necesario pa e empleadonan. Pa e motibo aki nan a adkeri Quinta del Carmen y e tereno di Bubali, cu e meta pa bin cu un hospital y centro di recuperacion.

E cas tabata tey caba y e hospital a wordo traha parti patras den año 1920. Quinta del Carmen a bira e cas di e dokter, pero mientras nan tabata trahando e hospital, e pashentnan a wordo trata eynan, asina ta, bo tabata sinta den e prome hospital di Aruba. segun historia. Dr. Horacio Oduber tabata pasa riba su cabay, tene consulta. Tambe e tabata haci operacion, pero na su cas na Quinta del Carmen. Ora dokter Cameron a yega, el a trece su mama y e por a keda den un di e cuartonan pa bishitante cu a wordo traha unda tabatin e bañonan. Segun e hospital tabata wordo estableci, e nursenan den Quinta del Carmen y e dokter a move pa un cas nobo cien meter panort di e cas.

Dia e Di Dos Guera Mundial a cuminsa, e refinaria y e hospital a wordo sera temporalmente. Quinta del Carmen a bira e “club” pa e poco staf cu a keda atras, pero masha pover manteni. Despues di guera, e staf di e refinaria a wordo convenci pa habri Quinta del Carmen di nobo pa acomoda un luga di keda pa e staf. E dokter a keda biba riba e tereno, pero e hospital no a habri bek, y a cay den decadencia total.

Despues el a bira un cas priva, restaura y manteni mas tanto posibel den su arkitektura original pa e doñonan cu a biba eynan. E cas a wordo adkeri pa famia Hamers, cu afortunadamente a mantene e cas den un bon condicion, y a yuda pa haya e storia rico di e edificio aki.

E hospital a wordo nombra pa e prome dokter Arubiano, kende tabata trata su pashentnan den su cas (Quinta del Carmen) prome cu e prome hospital di Aruba, San Pedro de Verona a wordo estableci pa e nursenan Catolico na año 1920. Hospital San Pedro de Verona a wordo converti den un cas pa nursenan na año 1977 ora cu Hospital Dr. Horacio Oduber a cuminsa ricibi su prome pashentnan. Entre 1938 pa 1985 e refinaria di Lago na San Nicolas a bin cu e di dos hospital pa trata primordialmente su empleadonan, nan famia y cuidadanan priva y segura. Tabata na año 1985 cu e hospital aki a sera cu a haci cu Hospital Dr. Horacio Oduber a bira e unico hospital riba e isla. E hospital aki tabata uno general y un centro di trauma di nivel III, situa na Eagle Beach den e area di Oranjestad.

Na fin di año 2014, e mansion Arubiano aki di mas o menos cien año bieu, situa na Bubali 119 a wordo renoba y converti den un restaurant pa e doño di Barefoot Grill Restaurant cu a mantene e nomber di Quinta del Carmen Restaurant. El a habri riba dia di Pasco, 24 di December 2014. E tin un bunita ambiente. E cas a wordo completamente restaura cual ta inclui un bunita hardin, yen di mata y flor, patras unda huespednan por sinta y disfruta di un atmosfera agradabel. E staf fantastico, servicial y atento cu ta ricibiendo elogio continuo riba nan website, di esnan cu a bishita e restaurant.

Famia Jeandor:

Persey su tata, _____ y mama, _____ a traha na Hospital Quinta del Carmen. Su tata tabata traha cu Dr. Harmsen. Pesey nan a lanta den e dos casnan patras di Quinta del Carmen, door cu e tabata hunto cu e fundador di Crus Cora na Aruba, esta Dokter Dussenbroek. Persey su tata a traha na Arend Petroleum Maatschappij (Shell). Caminda cu veld di Bubali ta awo, tabatin un cancha di golf. E tempo ey, Persey y Sonny Tiel, como mucha tabata piki bala pa: Merryweather, Pasnich, Barbour, Every, Vi Hendriquez y hopi mas. Persey, actualmente tin un tanta, _____, casa cu Belin, mama di Edwin (Jack) Tromp cu ta wardando algun famia for di Inglatera cu a traha cu nan. Nan ta bin pa un encuentro familiar. Mama di Jack Tromp actualmente ta na Mari Stella. Papa Doen tabatin un cunucu planta cu maishi, bonchi y patia patras di Hato.

Famianan cu tabata biba schuin pariba di famia Jeandor tabata Sr. y Sra. Juan Hidalgo (Venezolano), tata di Oscar, Chinto, Dora, Bito y otronan. Patras di nan tabata biba, den un cas pega cu e boticanan di Dokter Dussenbroek, famia Pedro y Bibi Giel, cu tabata mayornan di Eddy y Prins Giel. Banda di nan tabata biba tambe Sr. Scotty Barbour, tata di Barbour (dfm) cu a traha ultimo na Aruba Trading na Playa. Casa di Scotty ta Sra. Aida Henriquez, ruman di defunto V. Henriquez cu tabata mancha e stacion di gasolin (Shell) riba boulevard, na Playa, pabou di Oficina di Aduana. E tempo ey tabatin loods banda di Teatro De Veer.

Sr. Nicky Habibe tabatin su planta di ijs na Washington. Famia Jeandor a sali di Bubali y bay biba den un di e casnan di Sr. Habibe cu tabata keda pariba di Chaia Luidens, wela di Sr. Didi Donker. Mama di Didi, Sra. Meme, ta na bida ainda. Mangoteca tabata di Sr. Rey Luidens, kende ta padrino di bautismo di Persey. Baban Donker, tata di Didi, Ramon y otronan mester a para padrino di Persey, pero como cu e no tabata casa cu Meme, pastoor a nenga, y Rey Luidens a para na su luga. Rey Luidens tabatin un macaco cu tabata tira hende cu mango.

Dufi Kock

Escritor y Historiador

Savaneta 125-F

Tel: 584-1201

Cel: 592-9417

dufikock@gmail.com

Lid in de Orde van Oranje Nassau 2006

04-21-2015